



Franca Strasser e Katarina Kohlman

Novitads dall'Uniun da commerci e mistregn Glion e contuorn



La suprastonza selegra sil niev svilup cun ulteriuras activitads: Maria Pia Candinas Chappatte, Roman Derungs, Franca Strasser e Katarina Kohlman (da sen.). Silla foto maunca Remo Caminada.

FOTO AUGUSTIN BEELI

DAD AUGUSTIN BEELI/FMR

■ **Dacuort ei la radunonza generala dall'Uniun da commerci e mistregn Glion e contuorn stada. Quella gada ha l'uniun stuiu «s'entupar» virtualmein. La nova suprastonza vul restar fideivla a sia via.** Sco biaras autras uniuns ed instituziuns ha era l'Uniun da commerci e mistregn Glion e contuorn (UCMG) giu d'organisar sia radunonza generala a moda unica. Ils 160 commembers han retschert cun posta electronica la gliesta da tractandas cullas actas, protocol, rapports e propostas. Igl ei la fuorma ch'il cussegl federal ha introduciu cun sia ordinaziun pervia dalla pandemia Covid-19. Sper las tractandas statutaricas eis ei stau d'eleger uonn dus suprastonts. A scret han ils commembers dau suatientscha allas propostas dalla suprastonza. *Dominik Dosch*, ch'ei staus biars onns

commember da quei gremi ed ils davos quater onns copresident, haveva demissiunau. Sco sia successura han ils commembers eligiu *Katarina Kohlman*, la meinagestiu dalla Casa Sentupada ella claustra da Glion. *Roman Derungs*, meinagestiu dalla garascha Auto Derungs AG, remplazza *Rino Caviezel* ch'haveva medemamein demissiunau.

Carta da schenghetg prosperescha

Cunquei ei la squadra directiva dall'UCMG puspei completa. *Franca Strasser* resta copresidenta, quei post meina ella da niev ensemen cun *Katarina Kohlman*. Lur consuprastonts ein *Maria Pia Candinas Chappatte*, *Remo Caminada* e da niev *Roman Derungs*. La suprastonza selegri da trer vinavon il carr cun slontsch e novas ideas, conferma la copresidenta Strasser. «Igl ein incumbensas

multifaras», cumpletescha ella el discurs culla FMR. Ella descriva tgei che l'uniun fa davos las culissas: «Noss'uniun s'engascha pils interess da tuttas branschas da commerci, mistregn e gastronomia sco era per la tgira dils contacts denter las interpresas pintgas e mesaunas da Glion e contuorn», circumscriba la copresidenta.

Per exempel dess ei negina exposiziun ILHGA senza l'UCMG ed era buca l'occurrentza «primavera». Quest atun fuss puspei in termin dall'ILHGA, ella ei denton annullada pervia dalla pandemia da corona. «Tonpli selegrein nus silla fiera d'advent la davosa sonda dil november respectiv emprema dumengia d'advent», puntuescha Strasser. Ella ei dalla ferma speronza da saver organisar quell'occurrentza tradiziunala. L'UCMG ei medemamein involvida en projects ch'ella ha per part iniziau, sco quel dalla vi-



schnaunca per sviluppar Glion sco center regional persistent.

La carta da schenghetg da Glion ei in product dall'UCMG che prosperescha e fa actualmein plascher a responsabels e commembers. «La statistica digl'empreme mez onn 2020 fa surstar nus positivamein», declara Strasser. Malgrad che tut seigi stau eri questa primavera bunamein dus meins seigi la reducziun dallas venditas mo 8,95 pertschien. In ferm fevrer ed ina renaschientscha fulminonta il matg e zercladur han contribuì a quella sorpresa. La carta da schenghetg da Glion dat ei dapi otg onns, actualmein ein 24 fatschentas participadas. La purschida para da corrispunder al giavisch da tut ils cercchels dalla populaziun, famiglias, clientella, commembers d'uniuns, amitgs e collaboraturas cumpran quella carta. Il product duei, ord la vesta dall'UCMG, rinforzar la creaziun da valur ella regiun.

Muentar – setener ensemen

Sco cuminonza d'interess da stizuns, gastronomia, survetschs e mistergners dalla regiun ei il coronavirus ina gronda sfida per l'UCMG. En ina moda ni l'autra ein tuts 160 commembers pertuccai. Gest il «lockdown» dils 16 da mars 2020 ha giu consequenzas. Anetgamein ein tuttas fatschentas pintgas e mesaunas stadas confruntadas cun problems gravions. Ella davosa revista d'informaziun «Porta Cotschna» dalla vischnaunca Ilanz/Glion ha il copresident partent Dominik Dosch resumau sias impressiuns: «Immediatamein havein nus purschìu sustegn a nos commembers. L'UCMG ha surpriu l'incumbensa da comunicar en fuorma coordinada las purschidas ed ils survetschs actuals. Sur differents canals havein nus rendìu attent allas pusseivladads d'empustar e furnir, ei ha dau stans e bauns da survir, ins ha informau da survetschs creativs», ha Dosch rapportau.

Ussa denton stoppien ins mirar egl

avegnir, declara era la nova squadra directiva dall'uniun. Strasser e Kohlman vulan stimular e muentar, denton era mantener e tgirar il cumprovau. «Sco squadra comunabla motivada vulein nus era promover il patertgar communal da tuts. Ellas duas e lur consuprastont vulan stimular ils 160 commembers per in patertgar ella fuorma «nus» e buca mo «jeu».

In project: Sviluppar il center

Novs impuls duei era il project «sviluppar il center» dalla vischnaunca Ilanz/Glion dar. Igl ei in project che l'UCMG ha iniziàu, ussa ha la vischnaunca integrau el ella revisiun actuala dalla planisaziun locala. Igl'empremarcau spel Rein duei buca negligire durmentarsiusvilup. L'UCMG haveva adina giavischau che la vischnaunca s'engaschi meglier per l'attractivitat da Glion sco center regional. Ina consultaziun tiels commembers haveva mussau avon treis onns ch'ins giavischì explicitamein in engaschi politic persuerter. Cul sustegn ideal ed administrativ dalla vischnaunca ei ina gruppa directiva seformada. Denter auter fan era representants da Surselva Turissem e Regiun Surselva part da quei gremi. Finamira eis ei da sviluppar Glion sco center, rinforzar il liug e sia attracziun persistenta. Buca mo il commerci da detagl, gastronomia e survetschs dueien sesviluppar. Il project «sviluppar il center» pertucca l'entira capacitat da prestaziun da Glion e contuorn.